

## **Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaat nr. 9, 1. juni 2017-imeersoq**

§ 1. Procenti aaqqiissutissaq nuussinikkut isertitat, akileraarutit, akitsuutit il.il. ukiumoortumik aaqqinneqarnissaannut tunngaviusussaq ukiunut aningaasanut inatsiseqarfiusunut tamanut, inatsimmi matumani aalajangersakkat naapertorlugit angissusilerneqartassaaq.

*Imm. 2.* Procenti aaqqiissutissaq atorlugu aaqqinneqartussat tassaapput kisitsisit manna tikillugu atuuttuusut.

### *Procenti aaqqiissutissaq*

§ 2. Ukiumi aningaasanut inatsiseqarfiusumi procenti aaqqiissutissaq tassaavoq pisortani atorfeqartut ukiumi akissarsiaqarfiusumi ukiumut akissarsiaasa, ukiumut akissarsiaqarfiusumut siulianut sanilliullugu procentinngorlugu allannguutaat. Procenti aaqqiissutissaq uniffiup talerpiani kisitsimmik ataatsimik kisitsiseqartillugu naatsorsorneqartassaaq.

*Imm. 2.* Ukioq akissarsiaqarfiusoq tassaavoq, ukioq aningaasanut inatsiseqarfiusoq ukiunik marlunnik sioqqullugu ukioq.

*Imm. 3.* Ukiumut akissarsiat pisortani atorfeqartut ukiumut akissarsiaasa tamarmiusut, so-raarnerussutisiaqarnissamut aaqqissuussinernut il.il. akileeqaataassuutit sulisitsisunit isumagineqartut ilanngunnagit, ataatsimoortillugit sanilliunnerisigut naatsorsorneqartassapput.

§ 3. Procentip aaqqiissutissap angissusissaa Naalakkersuisut ukiut tamaasa kingusinnerpaamik augustip qaammataani nalunaarutigisassavaat.

§ 4. Procentip aaqqiissutissap il.il. naatsorsorneqarnissaat pillugu maleruagassat sukumiinerusut, matumani aamma maleruagassat ukiumut akissarsiat ineriartornerannik § 2 naapertorlugu naatsorsuinissami kisitsisitigut tunngavissat allannguuteqartarnissaannik aamma piffissap suliffiusup il.il. allannguuteqartarnissaannik naatsorsuutiginnittut Naalakkersuisunit aalajangersarneqarsinnaapput.

### *Maannakkorpiaq aningaasarsiat*

§ 5. Maannakkorpiaq aningaasarsiat tassaapput inuup qaammatini 12-ini aningaasarsiai akileraaruteqaataasussat aamma soraarnerussutisiai, Aningaasarsianit akileraarutit pillugit Inatsisartut inatsisaanni § 39 a-mi pineqartut.

*Imm. 2.* Maannakkorpiaq aningaasarsianik naatsorsuinermit ilanngaaticineqartassaaq inuup ukiumi aningaasarsiorfiusumi, tapiissutinik tunniussinissaq pillugu aalajangiiffiusumi, akiliutissanik il.il. angissusiliiffiusumi ilanngaata aalajangersimasoq, Aningaasarsianit akileraarutit pillugit Inatsisartut inatsisaanni § 21, imm. 2-miittoq. Inoqtigiit maannakkorpiaq aningaasarsiaat tunngavigalugit aalajangiisoqassappat, inuit 18-it inorlugit ukiullit ilanngaataat aalajangersimasoq

ilanngaatigineqartassanngilaq, soorluttaaq inoqutigiinnut ataatsinut inummut ilanngaatit annerpaamik marluk ilanngaatigineqarsinnaasut.

*Imm. 3.* Naatsorsuinermi ilanngunneqassanngillat:

- 1) soraarnerussutisiaqarnissamut aaqqissuussinernut Aningaasarsianit akileraarutit pillugit Inatsisartut inatsisaanni § 39 a-mi taaneqartunut akiliutit akileraaruteqaataasussat, aamma
- 2) Pisortanit ikiorsiissutit pillugit Inatsisartut peqqussutaat naapertorlugu ikiorsiissutit.

*Imm. 4.* Naalackersuisut maannakkorpiaq aningaasarsiat naatsorsornissaat pillugu maleruagassanik erseqqinnerusunik aalajangersaassapput. Aamma soraarnerussutisiat § 39 a-mi pineqartut aamma akissarsiat, Aningaasarsianit akileraarutit pillugit Inatsisartut inatsisaanni § 70-imi § 71-imilu pineqartut akileraarutit ilanngaatigineqartinnagit nalinginut qanoq naatsorsorneqartarnissaat aammalu aningaasarsiat il.il. ilaasa ilanngunneqartanninnissaat Naalackersuisut aalajangersarsinnaavaat.

*Imm. 5.* Inuk qaammatini 12-imi aningaasarsianik akileraaruteqaataasussanik akissarsiaqarsimangippat imaluunniit Aningaasarsianit akileraarutit pillugit Inatsisartut inatsisaanni § 39 a-mi pineqartunik soraarnerussutisiaqarsimangippat, Naalackersuisut maannakkorpiaq aningaasarsiat naatsorsorneqarnissaat pillugu maleruagassanik erseqqinnerusunik aalajangersaassapput.

**§ 6.** Inuup maannakkorpiaq aningaasarsiaasa 5 procentimik tassanngaluunniit anginerusumik allannguuteqarnissaat naatsorsuutigineqarpat, maannakkorpiaq aningaasarsiat maannakkorpiaq aningaasarsiasatut naatsorsuutigisat tamarmiisut tunngavigalugit naatsorsorneqassapput.

#### *Atortuulerfia*

**§ 7.** Inatsit 1. juli 2018-imi atortuulissaaq, atuutissallunilu ukiumut aningaasanut inatsiseqarfiusumut 2019-imut procentip aaqqiissutissap angissusilerneqarnera aallarnerfigalugu.

*Imm. 2.* Inatsisip atortuulersinneqaneratigut Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. 29, 28. november 2016-imeersumi § 2, imm. 3 atorunnaarsinneqarpoq.

*Namminersorlutik Oqartussat, ulloq 1. juni 2017*

Kim Kielsen